

Guangjisi Minzcu Bau

ganhhau: CN45-0036 B.2015 Nd.8 Ng.26 liggaeuq ietfeih nienz ndwencaet cibsam

广西民族报

(壮文版)

主办:广西区民语委

出版:广西民族报社

出版周期:逢星期三出版

出版期数:总第3188期

Denzdungh: Fazdingz Aeu Vahcuengh Banh'anq

田东: 壮语法庭入乡随俗

“Ciuq vunz hengz, yawj dieg guh, raen vunz maz gangj vah maz”, Denzdungh Yen Yinzminz Fazyen gyoengq fazgvanh gangj song cungj vah de, roengz mbanj haeuj ranz banh'anq, couh baenzneix hengzguh. Fazgvanh gangj vah dangdieg, singyaem sug, vunz cungj rox, sim diepgyawj, hawj fazgvanh caeuq boux daeuj banh saehgauq doxgyau lai fuengbienh. Fazgvanh aeu Vahcuengh banh'anq, hawj vunzlai dangdieg dingq ndaej rox, vunzlai Mbanjcuengh souh'ik

haujlai.

8 nyied 6 hauh, aen fazyen neix Yincaz Fazdingz aeu Vahcuengh daeuj saemjleix anqgienth, aen anq neix dwg Mungzmouj gauq 8 boux lwg doxceng cienzngaenz ciengxlaux. Youq saemjleix seizde, fazgvanh aeu Vahcuengh dangdieg gangj gak diuz faplwd, hawj bouxgauq nienzgeij geq dingq. Doeng-gvaq gangj dauhleix, ciuq faplwd, gaijgez le gienth saehgauq neix, hawj bouxbangxhenz yawj le haenhndei.

Ciuq cam rox, aen yienh neix dwg

dieg lai aen minzcu comzyouq, ndawde vunz Bouxcuengh ciemq dingzlai, vunzmbanj dangdieg ndawde doenghboux nienzgeij geq mbouj rox Vahgun Sawgun. Aen fazyen neix laeb fazdingz Vahcuengh, Bujdunghva nem Vahcuengh doxlawh gangj, daengz gak dieg aeu song cungj vah liebcunz hai fazdingz 10 lai baez. Neix youq lajmbanj cienzbo faplwd, hawj vunzlai lai fuengbienth banh saeh doxgauq, hawj banh'anq yauliz lai sang.

(Vangz Feih/黄飞 Veiz Yizvan/韦益万)



Sanhgyangh: Mbanj Duncuz Guhbaenz Laeuzgyong Moq

三江: 侗乡鼓楼添新丁

8 nyied 22 hauh, Sanhgyangh Duncuz Swciyen Liengzgouj Yangh Yinzdanz Cunh gawjbanh hozdung anqghoh laeuzgyong Yinzdanz laebbaenz. Ngoenzde, vunz ndaw cunh nem cunhmbanj depgyawj doxcomz giz ndeu, bouxboux cungj daenj ndangdaenj minzcu, ciengqgo diuqfoux, aeu neix daeuj anqghoh laeuzgyong moq laebbaenz, vunzlai anqgyangz raixcaix. Ndaw doz dwg vunzmbanj dangdieg youq naj laeuzgyong moq diuq fouxvenz caijdangz.

(Gunj Yicungh/梁亿忠 ing)

Swcigih Minzyijveij Daengz Yungzsuij Caz Geiq Vahmyauz

自治区民语委到融水调查苗语

8 nyied 19 hauh, Swcigih Minzyijveij Gohyenzcu diuyenzcu daengz Yungzsuij Myauzcuz Swciyen cazyawj, geiqloeg nem cingjeix singyaem vah Bwzmyauz.

Youq ndaw yienh neix, vah Bwzmyauz dwg ndaw yienh cungj Vahmyauz ndeu, cungj vah neix cij miz Yanghfwnj Yangh, Swyungz Yangh,

Vanzbauj Cin, Ganjdung Yangh daengj seiq aen yanghein neix mbanj vunz gangj, gungh miz 11080 vunz yungh.

Gaenh bi daeuj, aen yienh neix dangjveij, cwngefuj gaenxmaenx lwnh-gangj cingzgvang hawj Swcigih Minzyijveij, maqmuengh miz vunz daeuj diucaz, geiqloeg nem cingjeix giij singyaem Vahbwzmyauz,

Swcigih Minzyijveij rox le gig yawj-naek gienth saeh neix, couh youq 8 nyied 19 hauh baij diuyenzcu daengz Yungzsui diuyenz Vahbwzmyauz. Baez diucaz neix aeu guh sat hong soucomz geiqloeg 5000 aen sawloih Vahbwzmyauz.

(Veiz Yungzcinh/韦荣春)

SIUSIK DINJ

简讯

● 8 nyied 20 hauh, Cing-sih caet nyied cocaet ciet aendomq youq Cingsih Yen Lungzdan gawjhengz. Haemhde, hozdung yienhciegz daeng ronghcagcag ne, vunz cien vunz fanh, gofoux biujyienj youq aen daizheiq gwnz raemx gawj-hengz, ndeiyawj raixcaix.

(Siuh Fazlingz)

● Dangqna, youq gih raeuz, cingq dwg mwh gak dieg nyaengq banh daigvanj banghag. Daengz 8 nyied 16 hauh, daengx gih gungh hawj 15.25 fanh vunz banh daigvanj banghag, hozdungz cienzngaenz 9.55 ik maenz. Guj bineix cungj daigvanj neix yaek hawj 32 fanh hagseng souh'ik, cuengq daigvanj 22 ik maenz.

(Vangz Swhcang)

● 8 nyied 18 hauh, Gveigangj Si nyezoiq ciet Fwencuengh yienjok hozdung youq Yinghleaz Gungh Vwnzyi Cunghsinh gawjbanh, ndaw si 14 aen vwnzyidui faenbied yienj Heiqcuengh, ciengq go Vahcuengh, eu Fwencuengh, diuqfoux daengj, dazyinx geij bak vunz daeuj yawj. Baez hozdung neix hawj lwnyeyz bouxcoz gyalai rox Fwen-cuengh, lai gaenxmaenx hungz-yangz nem swnjcienz vwnzva Bouxcuengh.

(Veiz Giva)

● Bi' gvaq, Lozcwngz Mulaujcu Swciyen “daengx yangh doihaeuj” hanghmoeg dajsuenq baugvat gihcu sezsih, canjyez bangfuz daengj 77 aen hanghmoeg, gungh roengzngaenz 1.8 ik maenz. Dangqna, gaeng guh sat nem cingq guh 55 aen hanghmoeg, dajsuenq guh roxnaeuz yaek haigoeng guh 12 aen hanghmoeg, gungh miz 73.3% cingq guh roxnaeuz guh sat.

(Mungz Cwnghsw)

● Bineix, Duh'an Yauzcuz Swciyen laeb makit byauh-cunjva dajndaem gihdi, dajndaem makit 4000 lai moux. Linghvaih ndaem makitbya 6 fanh lai moux. Makit canjyez gaeng baenz aen canjyez hawj nungzminz ndaej laisou ndeu.

(Hanz Ginhcinz)